

Inatsisissatut siunnersuummut nassuiaatit

Nassuiaatit nalinginnaasut1. Aallaqqaasiut:

Pisortani neqerooruteqartitsisartut sanaartugassanik neqerooruteqartitsisarneq, tamatumalu kingorna suliaassanik tunniussisarneq eqqarsaatigalugu inuiaqatigiit aningaasaqarnerannik ataatsimut isiginninniarnerisa pinngitsoorani pisalernissaa politikereit tungaanniit kissaatigineqarpoq. Sanaartornermi neqerooruteqartarnermi oqaatsip inuiaqatigiit aningaasaqarnerannik eqqarsaateqarnerup iluaniissinnaasut annertussusissarpiaat tupinnanngitsumik ersarissumik nassuiarneqarsinnaanngilaq. Neqeroorutit sanaartornermut suliaasaqarfimmi piginnaasaqarnernik ineriartortitsinermik ilaqarsinnaasut (soorlu sanaartugassalerisunik suliaqartinneqartussanik toqqaanikkut), imaluunniit neqeroorutit suliaasaqarfiup iluani sulisussat ilinniartitaanerannik siuarsaaffiusussat (assersuutigalugu ilinniartunik atorfinitsitsinikkut) aalajangersimasumik assersuutigineqarsinnaapput.

2. Siunertat tunngaviusullu

Naalakkersuisut nalunaarusiornikkut, neqerooruteqartitsisartut neqerooruteqartarnermut inatsimmi § 1, imm. 2-mi taaneqartut pitsaassuseq tunngavigalugu unammilleqatigiissitsiviusumik neqerooruteqartitsinermi isiginiagassaannik maleruagassiorsinnaanerinit sinaakkusiussassat pisariaqartinneqartut pilersinneqarnissaat, allannguutissatut siunnersuuteqarnermi siunertarineqarpoq.

Neqerooruteqartarnermut inatsimmi akitigut unammilleqatigiinnerit (suliakkiinissamut piumasaqaatini "aki appasinnerpaaq"-mik atuiffiusut) aamma pitsaassuseq tunngavigalugu unammilleqatigiinnerit (suliakkiinissamut piumasaqaatini "neqeroorutit aningaasaqarnikkut iluanaarnarnerpaat"-mik atuiffiusut) akornanni immikkoortitsilluinnartoqarpoq.

Neqerooruteqartarnermut inatsimmi pitsaassuseq tunngavigalugu unammilleqatigiinnermut maleruagassani anguniagaasoq tassaavoq, akit pillugit unammilleqatigiinnerinnarmut tunngasut aallunneqannginnerini sanaartukkami naammassisaqarsinnaassutsip annertusineqarnissaa.

Kisiannili pitsaassuseq tunngavigalugu unammilleqatigiinnerni, tassalu suliaakkiinissamut aningaasaqarnikkut iluanaarnarnerpaanik neqerooruteqarnissamut tunngaveqarfiusuni akiusoq tamatigut neqeroorutiniq nalilersuinnermut tunngaviusunut ilaatinneqartassaaq. Tamanna suliaakkiinissamut piumasaqaatini "aningaasaqarnikkut iluanaarnarnerpaamik neqerooruteqarneq"-rup kingunerissavaa, tassalu "iluanaarnarnerpaamik neqerooruteqarneq" kisimi tunngavigineqassanngilaq. Kisiannili pitsaassuseq tunngavigalugu unammilleqatigiissitsinikkut akiusorpiaap saniatigut pissutsinik allanik ilanngussinissamut

periarfissat atorluarneqassapput – soorlu pitsaassuseq, piffissaq sanaffiususaaq, avatangiisinut sunniutit il.il.

Tamatumunnga atatillugu erseqqissaatigineqartariaqarpoq, neqerooruteqartarnermut inatsisip ilusiligaanera tunngavigalugu ullumikkut neqerooruteqartitsisartut inuiaqatigiit aningaasaqarnerat eqqarsaatigalugu unammilleqatigiinnermut tunngavissanik ilaatitsinissaq periarfissaqarfingereermassuk. Tassalu oqaaseq ”anigaasaqarnikkut iluanaarnarnerpaamik neqerooruteqarneq” inuiaqatigiit aningaasaqarnerannik eqqarsaateqarnermut ilaatinneqarluarsinnaavoq, aammalu ”inuiaqatigiit aningaasaqarneranni iluanaarnarnerpaamik neqerooruteqarneq”-mut sanilliullugu inatsisip teknikkimut tunngasortaannai eqqarsaatigalugit taaguutit taakku akornanni taaguutaasa assigiinnginnerisa saniatigut assigiinngissuteqartoqanngilaq.

Neqerooruteqartarnermut inatsisip atuunnerani piffissami siullermi misilittakkat takutippaat, aningaasaqarnikkut iluanaarnarnerpaamik neqerooruteqarneq tunngavigalugu suliakkiinissamut piumasaqaatit eqqortumik atorneqarnissaannut assersuutitut pitsaasunut innersuussinissaq malunnartumik pisariaqartinneqartoq. Tamatumunnga atatillugu piumasaqaatinik taamaattunik, neqerooruteqartunut ilaatigut inuiaqatigiit aningaasaqarnerannut kissaatitut aqutissiuissusannik aalajangersaanissamut maleruagassatigut tunngavissaqarnissaq naleqquttutut pisariaqartutullu isumaqarfigineqarpoq.

3. Siunnersuutip immikkoortui pingaarnit:

Siunnersuutip atuutilernergatigut neqerooruteqartarnermut inatsimmi aalajangersakkanut sinaakutissannik ilanngussisoqassaaq, taannalu malillugu sanaartornermi neqerooruteqartitsisarnermi pitsaassuseq tunngavigalugu unammilleqatigiinnermut maleruagassannik Naalakkersuisut aalajangersaanissamut piginnaatinneqarput.

Piginnaatitsissut aningaasaqarnikkut iluanaarnarnerpaamik neqerooruteqarnermi tunniussinissamut piumasaqaatinik atuinissarpiaamut maleruagassiornissamut, tamatumalu saniatigut pitsaassuseq tunngavigalugu unammilleqatigiiffiusumik neqerooruteqartitsinissamut piumasaqaatinik maleruagassiornissamut atuuppoq.

Aalajangersakkanut sinaakutissatut siunnersuutigineqartoq naapertorlugu maleruagassiarineqartut neqerooruteqartitsisartunut, inatsimmi § 1, imm. 2-mi pineqartunut atuutissapput, tassani atuutsitsinngitsoorfiususannut maleruagassani allamik aalajangersaasoqarsimangippat.

4. Pisortanut aningaasaqarnikkut allaffissornikkullu sunniutissat:

Siunnersuut maannakkorpiaq pisortanut aningaasaqarnikkut allaffissornikkullu sunniuteqassanngilaq. Kisiannili Namminersorlutik Oqartussanut kommuninullu pisortanit illuliornissamik sanaartornissamillu neqeroortitsisuusunut maleruagassat inatsisissatut

siunnersuut malillugu aalajangersarneqartut aningaasaqarnikkut allaffissornikkullu aalajangersimasutigut sunniuteqassapput.

Taamaattorli ilimanarpoq allaffissornikkut suliakkersuutaasussat annikitsuinnarmik annertusissasut, kisiannili suliaqarneq suliassanut neqeroortitsiviusunut aaqqiissutissatut neqeroorutaasut pitsaassusaasa qaffasinnerulernissaannik naatsorsuutigisaqarnermik taarteqartussaalluni. Pisortat neqeroortitsisussat – pisut aalajangersimasut ataasiakkaat apeqqutaallutik – maleruagassat inatsisissatut siunnersuut malillugu aalajangersarneqartut malillugit neqeroortitsinermik ingerlataqarnermi inuiaqatigiit aningaasaqarneranni eqqarsaatigisassat ilanngunneqarnerat, neqeroorutaasut akiinik qaffasinnerulersitsisinnaasoq misigeratarsinnaassavaat.

5. Inuussutissarsiornermut aningaasaqarnikkut allaffissornikkullu sunniutissat:

Siunnersuut maannakkorpiaq inuussutissarsiornermut aningaasaqarnikkut allaffissornikkullu sunniuteqassanngilaq. Taamaattorli maleruagassat inatsisissatut siunnersuut malillugu aalajangersarneqartut pissutallutik kaaviiartitat suliffissaqartitsinerullu annertunerulerneranni inuussutissarsiortunut aningaasaqarnikkut sunniutaasussat iluaqutaasasut naatsorsuutigineqarpoq.

6. Innuttaasunut aningaasaqarnikkut allaffissornikkullu sunniutissat:

Siunnersuut maannakkorpiaq innuttaasunut aningaasaqarnikkut allaffissornikkullu sunniuteqassanngilaq. Taamaattorli innuttaasunut – tamaalillunilu ataatsimut isigalugu inuiaqatigiinnut – maleruagassat inatsisissatut siunnersuut malillugu aalajangersarneqartut peqqutaallutik aningaasaqarnikkut sunniuteqarsinnaavoq.

Ataatsimut isigalugu inuiaqatigiinnut aningaasaqarnikkut sunniutaasussat, inuussutissarsiortuni kaaviiartitat suliffissaqartitsinerullu annertunerulernerisa taamaalillunilu akileraarutigut tunngaviusut annertunerulernerisa malitsigisaannik pitsaasuunerusussaapput. Paarlattuanik suliniut aamma akeqarpoq, aammalu pisut ataasiakkaat apeqqutaallutik naatsorsuutigineqartariaqarpoq illuliornermi sanaartornermillu suliassat ingerlanneqarnissaat akisunerulersinnaasoq. Taamaalilluni inuiaqatigiinni aningaasaliinerni taakkuinnaat isigissagaanni ”annikinnerusumik pissarsinissaq” periaannaavoq.

Ataatsimut isigalugu inuiaqatigiinnut iluaqutaasussat aamma innuttaasunut iluaqutaasussaapput, kisiannili innuttaasunut ataasiakkaanut aningaasaqarnikkut sunniutaasussat aalla allatigut sunniussinnaapput. Tamanna assersuutigalugu pisinnaavoq, inuiaqatigiinni aningaasaqarnerup eqqarsaatigineqarnissaata ilanngunneqarnissaa pillugu inatsisissamut siunnersuummi piumasaqaatip malitsigisaanik, inissialiortiternerup immaqa akisunerulernerisa pissutigalugu ineqarnermut qaffasinnerusumik akiliisoqartussanngorpat.

7. Avatangiisinut pinngortitamullu sunniutissat:

Siunnersuut avatangiisinut pinngortitamullu sunniuteqassanngilaq. Taamaattorli naatsorsuutigineqarpoq maleruagassat inatsisissatut siunnersuut malillugu aalajangersarneqartut avatangiisinut pinngortitamullu iluaqutaasumik imaluunniit allannguuteqanngitsumik sunniuteqassasut.

8. Naalagaaffeqatigiinnermut aamma Namminersorlutik Oqartussanut pissutsit:

Siunnersuut Naalagaaffeqatigiinnermut imaluunniit Namminersorlutik Oqartussanut pissutsinut sunniuteqartussatut naliliiffigineqanngilaq.

9. Tusarniaaneq:

Siunnersuut KANUKOKA-mut, INI Byggeteknik A/S-mut, Iserit A/S-imut, Kalaallit Nunaanni Sulisitsisut Peqatigiiffiannut, NUSUKA-mut, SIK-mut, TSP – Teknikkikkut Siunnersuisartut Peqatigiiffiannut, Nukissiorfinnut, Mittarfeqarfinnut, Tele Greenland A/S-imut, Royal Greenland A/S-imut, Royal Arctic Line A/S-imut, KNI A/S-imut, Naalackersuisut Siulittaasuata Naalackersuisoqarfianut, Aningaasaqarnermut Naalackersuisoqarfimmut, Akileraartarnermut Aqutsisoqarfimmut, Inuussutissarsiornermut Suliffeqarnermullu Naalackersuisoqarfimmut, Siunnersuisoqatigiinnut Ataatsimiititalianullu Aqutsisoqarfimmut, Unammilleqatigiinnermut Nakkutilliisunut, Aalisarnermut, Piniarnermut Nunalerinermullu Naalackersuisoqarfimmut, Ilinniartitaanermut Ilisimatusarnermullu Naalackersuisoqarfimmut, Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoqarfimmut, Peqqissutsimut Naalackersuisoqarfimmut, Nunamut Namminermut, Pinngortitamut Avatangiisinullu Naalackersuisoqarfimmut, Aatsitassanut Ikummatissanullu Pisortaqarfimmut, Greenland Development-imut, Greenland Venture A/S-imut, Kalaallit Nunaanni Eqqartuussivinnut aamma Kalaallit Nunaata Eqqartuussivianut tusarniaassutigineqarpoq.

10. Tusarniaanermi akissuteqaatit:

Tusarniaanermi akissuteqartuupput KANUKOKA, INI Byggeteknik A/S, Kalaallit Nunaanni Sulisitsisut Peqatigiiffiat, KNI A/S, Aningaasaqarnermut Naalackersuisoqarfik, Akileraartarnermut Aqutsisoqarfik, Inuussutissarsiornermut Suliffeqarnermullu Naalackersuisoqarfik, Unammilleqatigiinnermut nakkutilliisoqarfik, Ilaqutariinnermut, Kultureqarnermut, Ilageeqarnermut Naligiisinaanermullu Naalackersuisoqarfik kiisalu Kalaallit Nunaanni Eqqartuussivik.

På baggrund af høringsvar fra KANUKOKA-mit, INI Byggeteknik A/S-imit kiisalu Aningaasaqarnermut Naalackersuisoqarfimmit akissuteqaatit tunngavigalugit, Namminersorlutik Oqartussanut, kommuninut, inuussutissarsiornermut kiisalu innuttaasunut, aningaasaqarnikkut allaffissornikkullu sunniutaasussat, ilanngullugu avatangiisinut pinngortitamullu sunniutaasussat, nassuiarneqarnerat assigiinngisitaarnerusumik inatsisissatut siunnersuummut nassuiaatini nalinginnaasuni ilanngunneqarpoq.

Tusarniaaffigineqartut taaneqartut taakkua tikkuarpaat, Namminersorlutik Oqartussanut kommuni nullu, inuussutissarsiortunut innuttaasunullu aningaasaqarnikkut allaffissornikkullu sunniutaasussat nassuiarneqarnerat, siunnersuummut tusarniaassutigineqartumut nassuiaatini nalinginnaasuni nassuiarneqarneratut isikkoqartillugu amigartutut isigineqartariaqartoq. Taamaalilluni allassimagaluarpoq inatsisissatut siunnersuut ataatsimut isigalugu aningaasaqarnikkut allaffissornikkullu sunniuteqassanngitsaq, taamatullu inatsisissatut siunnersuut avatangiisinut pinngortitamullu ingerlaannaq sunniuteqassanngitsaq.

Tamatuma saniatigut tusarniaaneq inatsisissatut siunnersuummi namminermi taamatullu inatsisissatut siunnersuummut nassuiaatini allannguuteqartitsinissamut pissutissaqalersitsinngilaq.

Aammattaaq tusarniaaneq pillugu allakkiaq ilanngunneqartoq innersuussutigineqarpoq.

Inatsisissatut siunnersuummi aalajangersakkanut ataasiakkaanut nassuiaatit*§ 1-imut*

Nr. 1-imut

Inatsisissatut siunnersuuteqarnerup kingunerisaanik § 35-p qulequtaa allanngortinneqarpoq, taamaalilluni aalajangersakkat imarisaannut naapertuuttunngortinneqarluni.

Nr. 2-mut

Imm. 2-mut.

Aalajangersakkami neqerooruteqartitsisartut, neqerooruteqartarnermut inatsimmi § 1, imm. 2-mi taaneqartut pitsaassuseq tunngavigalugu unammilleqatigiissitsiviusumik, tassalu suliakkiissummik tunniussinissamut aningaasaqarnikkut iluaqutaanerpaamik neqerooruteqarneq tunngavigineqartillugu neqerooruteqartitsinerminni isiginiagassaannik maleruagassiorsinnaanermut Naalakkersuisut piginnaatinneqarput. Taamaalilluni aalajangersakkami aningaasaqarnikkut iluanaarnarnerpaamik neqerooruteqartoqarnerani suliassamik tunniussinissamut piumasaqaatinik atuinissarpiaamut maleruagassat saniatigut, aamma pitsaassuseq tunngavigalugu unammilleqatigiiffiusumik neqerooruteqartitsinissamut piumasaqaatit (akit pillugit unammillernerinnarmut sanilliullugu) pillugit, tassungalu ilanngullugu pingaartumik inuiaqatigiit aningaasaqarnerannik isiginneriaatsinik ilanngussisinnaanermut maleruagassiorortoqarsinnaanera eqqarsaatigineqarpoq.

Tassani aalajangersakkamut sinaakkutissaq pineqarpoq, aammalu aalajangersakkap oqaasertaani oqaatigineqartutut taamaallaat pitsaassutsimut tunngatillugu unammilleqatigiinnermut sammitinneqarpoq.

Neqerooruteqartarnermut inatsimmi § 15, imm. 1, nr. 2-mi aningaasaqarnikkut iluanaarnarnerpaamik neqerooruteqarneq tunniussinissamut piumasaqaatigineqartillugu, piumasaqaatit immikkoortui suut pineqarnerisut assersuusiorneqarput. Allattukkalli tamakkiisuunngillat, aammalu ilaneqarluarsinnaallutik. Tassalu inuiaqatigiinni aningaasaqarneq eqqarsaatigalugu piumasaqaatinut immikkoortunik annertusisanik atuisinnaanermut maleruagassiorsinnaaneq aalajangersakkami siunertarineqarpoq, tassunga suliassaqrarfiit suut (kiassaanermik pitsanngorsaaneq, avatangiisinik pitsanngorsaaneq, piginnaanngorsaaneq, ilinniartitaaneq, isumaginninnermut suliassaqrarfik il.il.) pingaartinneqartariaqassanersut, aammalu inatsimmi naligiisitsinissamut tunngaviusut nalinginnaasut eqqarsaatigalugit qanoq atorneqassanersut ilaatinneqarlutik (neqerooruteqartitsisup neqerooruteqartitsinermini suliakkiinnerminilu neqerooruteqartunik toqqaanissap kinaassusersiunngitsumik immikkoortitsiviunngitsumillu, aammalu neqerooruteqartut akornanni assigiinngisitsiviunngitsumik pinissaa isumagissavaa).

Neqerooruteqartitsisup assersuutigalugu pissutsit, inuiaqatigiinni teknikkikkut aningaasaqarnikkullu ineriartortitsinermut iluaqutaasut ilanngussinnaavai, assersuutigalugu unammilleqatigiinneq aqputigalugu sanaartugassalerinermi sanasoqarnermilu suliffeqarfiit iluanni piginnaanernik ineriartortitsinissaq aammalu sanaartornermi sulisunik ilinniartitsinissaq siunertaralugu, sanaartugassalerisunik suliaqartinneqartussanik atuinissamut ilinniartunillu atorfinitsitsinissamut piumasaqaatinik allattuinnikkut. Piumasaqaatini immikkoortut allat tassaasinnaapput, neqerooruteqartut inuiaqatinnut inooqatigiinnermullu akisussaaffeqarnissaannut piumasaqaatit nassuiarneqarsimasut, tak. Corporate Social Responsibility-mi (CSR) tunngaviusut. Sanaartugassalerisut suliffeqarfianni assersuutigalugu ilinniartunut inissaqartitsisoqarsinnaavoq, aammalu inuusuttunut atugarliortunut suliffimmi misiliititsisoqartarsinnaalluni, sullivimmi avatangiisit isumannaallisaanerlu pillugit tullerriaartumik sulisoqarsinnaavoq, piginnaanngorsaasoqarsinnaavoq ilinniartitseqqittoqarsinnaallunilu il.il.

Aalajangersakkami ilaatigut neqerooruteqartitsisup ajornartinnagu naleqqutsillugulu inuiaqatigiinni isiginneriaatsinik ilaatitsinissaata qulakkeerneqarnissaa siunertarineqarpoq, tassungalu ilaavoq neqerooruteqartitsisup piumasaqaatinut immikkoortunik allattuinnermini, tamatumalu kingorna neqeroorutini nalilersuinnermini unammilleqatigiinnermut piumasaqaatinik (tak. § 7, imm. 2) aamma naligiissitsinissamut tunngaviusunik (tak. § 7, imm. 3) eqqarsaatigisaqarnissaa. Tassalu neqerooruteqartarnermut inatsimmi allassimavoq, piumasaqaatinut immikkoortut neqeroorutini assigiinngissutsinik naliliinissamut naleqquttuussasut, neqerooruteqartut assigiinngissuteqarnerat pineqarani. Aalajangersagaq malillugu maleruagassiarineqartuni piumasarineqarsinnaavoq, neqerooruteqartup qanoq iliorluni neqeroorutiminik pitsaanerpaamik pitsanngorsaanaissaanik ilisimannilersitsiviusumik neqerooruteqartitsisup piumasaqaatinut immikkoortut oqaasertalissagai.

Suliniutit, inuiaqatigiinni aningaasaqarneq eqqarsaatigalugu piumasaqaatinut immikkoortumik ataatsimik amerlanerusunilluunniit pilersitsiviusinnaasut pissutaallutik suliassaanaq eqqarsaatigalugu akisunerulersitsinnaapput. Tassa imaappoq sanaartugassap inuiaqatigiit aningaasaqarneranni akia suliassap niuernerme akianut naapertuunnani, kisiannili inuiaqatigiinni pissarsiassat arlallit, suliassap suliarineqarnerani ajornarunnaarsinneqartussat ilaatinneqarlutik. Aalajangersagaq naapertorlugu maleruagassiarineqartuni neqerooruteqartitsisup inuiaqatigiit aningaasaqarnerat tunngavigalugu suliniutit, sanaartugassamut naleqquttumik tunngavilersuinissamut amigaateqarfiusut naliliiffigissagai piumasarineqarsinnaavoq. Naliliinnermi suliniut aalajangersimasoq inuiaqatigiit aningaasaqarnerat eqqarsaatigalugu imminut akilersinnaanngitsoq paasineqarpat, tamanna suliniutip taamaattariaqarneranik kinguneqarsinnaavoq. Taamaattumik suliniutip aalajangersimasup inuiaqatigiit aningaasaqarnerat eqqarsaatigalugu imminut akilersinnaaneranut uppersaasiinissamut piumasaqaateqarneq pingaartumik oqartussaasunut aningaasaliisussanut soqutiginaateqartussaavoq.

Oqaaseq inuiaqatigiit aningaasaqarnerat tunngavigalugu naliliineq suliniummi iluaqutissanik akornutissanillu tulleriiaartumik naliliinernut tamanut tunngasuuvoq. Aalajangersagaq malillugu maleruagassiarineqartuni inuiaqatigiit aningaasaqarnerat tunngavigalugu naliliinermi suleriaaseq suliarluunniit aalajangersimasoq assigiaagaasoq tunngavigineqassasoq pillugu piumasqaateqarfiusumik oqaasertaliisoqarsinnaavoq.

§ 2-mut

Neqerooruteqartarnermut inatsimmi allannguutissatut siunnersuutigineqartup Inatsisartuni akuerineqarnermini piaarnerpaamik atuutsinneqalernissaa siunertaralugu inatsisissatut siunnersuutip piffissaq atuutilerfissaa toqqarneqarpoq.